

修訂日期: 2009/04/23 發行日期: 2009/5/9

發行單位: 中華電子佛典協會 (CBETA) <http://www.cbeta.org>

資料底本: 大正新脩大正藏經 Vol. 19, No. 990

原始資料: 蕭鎮國大德提供, 北美某大德提供

No. 990

大雲經祈雨壇法

若天亢旱時。欲祈請雨者。於露地作壇。除去瓦礫及諸穢物。張設青幕。懸青幡。香泥塗拭作一方壇。於壇中畫七寶水池。池中畫海龍王宮。於龍宮中有釋迦牟尼如來經說法相。佛右畫觀自在菩薩。佛左畫金剛手菩薩等侍衛。於佛前右畫三千大千世界主輪蓋龍王。佛前左畫難陀跋難陀二龍王。於壇四方。用瞿摩夷汁各畫一龍王。於東方畫一龍王。一身三頭。量長三肘。并眷屬圍繞。又於南方畫一龍王。一身五頭。量長五肘。并諸眷屬。又於西方畫一龍王。一身七頭。量長七肘。并眷屬圍繞。於北方又畫一龍王。一身九頭。量長九肘。并眷屬圍繞。皆在靉靄青黑雲中。半身已下如蛇形。尾在池中。半身已上如菩薩形。皆合掌從池涌出。於壇四角。置四清水瓶。隨其力分。飲食菓子等皆染作青色。以懺淨心布列供養。燒香散青色華。道場中所用皆作青色。祈雨之人若是出家苾芻。應具律儀。若俗士應受八戒。作法之時。喫三白食。每日香湯沐浴。著新淨青衣。於壇西面。以青物為座。即以香塗手。先應三密加持自身。及護壇場。案上置此大雲經。於一切有情起大慈悲心。至誠請一切佛菩薩加持。晝夜虔誠。讀此大雲經。或二人三人乃至七人更替讀誦。經聲不應間斷。亢旱之時。如是依法讀此大雲經。或經一日二日乃至七日。定降注甘雨。若災重不雨。更作必降甘雨。假使大海或有過限越潮。依此經作法轉讀。無不應効。應發願讀經所生功德迴向諸龍。願皆離諸苦難。發無上菩提心。為一切有情降注甘雨。

大雲經祈雨壇法